

समे – 12:25 hrs.

Amit Shah

केंद्री गृह मंत्री अमित शाह होरें जम्मू-कश्मीर च हाल च होई दी आतंकवादी घटनाएं दे मददेनजर इक बैठक लाइए प्रदेश दी सुरक्षा स्थिति दा जायजा लैता। बैठका च सेना, जम्मू-कश्मीर पुलिस ते खूफिया एजेंसिएं शाह होरें गी जम्मू-कश्मीर दी मौजूदा सुरक्षा स्थिति ते आतंकवाद खिलाफ कार्रवाईएं ते तैयारिएं दे बारे च जानकारी दिती। एह बैठक कुलगाम जिले च होए दे आतंकवादी हमले, जेदे च साबका फौजी दी मौत होई गई ते ओहदी घरे आहली ते इक बच्ची घायल होए हे, दे इक दिन मगरा लग्गी। जम्मू-कश्मीर दे उपराज्यपाल मनोज सिन्हा, डीजीपी नलिन प्रभात, सेना प्रमुख जनरल उपेंद्र द्विवेदी ते सेना, पुलिस ते सिविल प्रशासन दे अधिकारिएं एहदे च हिस्सा लैता। केंद्री मंत्री हुंदे आसेआ नीम फौजी बलें दे अधिकारिएं कन्नै इक होर सुरक्षा बैठक लाए जाने दी मेद ऐ।

<><><><><><>

Watershed-Yatra

प्रधानमंत्री कृषि सिंचाई योजना दे इक हिस्से दे तौरा पर वाटरशेड जातरा दी शुरूआत अज्जे थवां होआ रदी ऐ। एहदी जम्मू-कश्मीर च शुरूआत राईबाई, ग्रामीण विकास ते पंचैती राज मंत्री जावेद अहमद डार होर अज्ज कठुआ जिले दे हीरानगर थवां करंगन। एहदे तैहत भलेआं अज्जै-कल्लै दिएं सुविधाएं कन्नै लैस इक वाटरशेड जातरा वैन जम्मू-कश्मीर च 2 ज्हार 400

किलोमीटर दा सफर तैय करोग। एह राष्ट्रव्यापी वैन लोकें च जागरूकता पैदा करोग। एह अभियान पैहली मार्च तगर चलाया जाग। मुख्य भरै च वाटरशेड जातरा अज्जै थवां गै शुरू होआ करदी ऐ। केंद्री ग्रामीण विकास मंत्री शिवराज सिंह चौहान अज्ज हाइब्रिड मोड च वाटरशेड यात्रा दी शुरूआत करडन। एहदा वर्चुअल ढंग्गै सिर जम्मू-कश्मीर च बी प्रसारण कीता जाग।

<><><><><><>

Delhi Voting

दिल्ली च अज्ज विधानसभा दी 70 सीटें लेई वोट पाए जा करदे न। मतदान बड़लै 7 बजे थमां शुरू होई गेदा ऐ जेड़ा संझा 6 बजे तक्कर जारी रौहग। विधानसभा दे 70 निर्वाचन हल्कें च 13 जहार 700 शा मते मतदान केंद्र बनाए गेन, इंदे चा 70 मतदान केंद्रें दा पूरा प्रबंधन महिलाएं आसेआ ते 70 होरनें मतदान केंद्रें दा प्रबंधन दिव्यांगजनें आसेआ कीता जारदा ऐ। निर्वाचन आयोग नै बवस्थित ढंग्गै नै मतदान लेई 1 लक्ख 80 जहार शा मते चुनां कर्मी कीते देन। प्रधानमंत्री नरेंद्र मोदी होरें सब्बनें लोकें अग्गे अपील कीती ऐ जे ओह वोट पाने दे अपने अधिकार दा इस्तेमाल जरूर करन। इस चुनां च सब्बनें शा पैहले वोट पाने आहलें च राष्ट्रपति द्रौपदी मुर्मू, केंद्री मंत्री डॉ. एस जयशंकर, हरदीप सिंह पुरी, कांग्रेस दे सीनियर लीडर राहुल गांधी, सेना प्रमुख उपेंद्र द्विवेदी, दिल्ली दे उपराज्यपाल वी.के सक्सेना ते मुख्ख मंत्री आतिषी शामिल हियां।

<><><><><><>

Resham Kissan Mela

रेशम विकास मैहकमा 8 फरवरी गी उधमपुर जिले च रेशम किसान मेले दा सरिस्ता करा'रदा ऐ जेदा मकसद रेशम दियां खुबटियां तैयार करने आहलें गी इस खेतर दिएं नमिएं तकनीकें ते ढंग सरिस्ते बारे जागरूक करना ऐ। एह मेला इनें करसानें लेई इक ऐसा मौका होग जित्थे ओह इस खेतर दे माहिरें, वैज्ञानिकें ते कारोबारिएं ते जानकारी सांझी करी सकंगन ते उन्दे तजुर्बे कोला मता किश नमा बी सिक्खी सकंगन। मेले दा उद्देश्य नौजवानें, किरमकशें, करसानें ते ग्रामीण महिलाएं गी रेशम उत्पादन सरबन्धी बक्ख-बक्ख कम्में राएं सशक्त बनाना ऐ तां जे ओह इनें कम्में गी अपनी औंदन दा जरिया बनाइयै, अपने जीवन स्तरै गी उबड़ा चुक्की सकन।

<><><><><><>

Healthy-Baby

बच्चे दी नरोई सेहत गी बढ़ावा देने ते इस बारे लोकें अंदर दिलचस्पी ते जागरूकता पैदा करने दे मकसद कन्नै कल उधमपुर जिले दे पंचैरी इलाके च संगिठत बाल विकास स्कीम आई.सी.डी.एस तैहत सेहतमंद बच्चा प्रतियोगिता दा सरिस्ता कीता गेआ जेदा उद्घाटन पोषण प्रोग्राम दे जिला अफसर सुभाष चंद्र होरें कीता। इस मौके पंचैरी ते उधमपुर दे सी.डी.पी.ओ बी मजूद हे। जिला विकास कमिशनर हुंदी पूरी पराती दिक्ख-रिक्ख च आयोजित इस कार्यक्रम च लोकें गी बच्चें दी नरोई सेहत लेई उंदे खानपान ते होरनें गतिविधिएं दे महत्वै बारे जागरूक कीता गेआ।

<><><><><><>

Trump

अमरीकी राष्ट्रपति डोनाल्ड ट्रम्प होरें आखेआ ऐ जे अमरीका, युद्ध प्रभावित गजा पट्टी गी अपने कब्जे च लेइयै इसी आर्थिक तौरा पर विकसित करने दी योजना बना करदा ऐ। व्हाइट हाउस च अज्ज इजरायल दे प्रधानमंत्री बेंजामिन नेतन्याहू हुंदे कन्नै इक सांझे संवाददाता सम्मेलन च ट्रम्प होरें आखेआ जे गजा च सब्बनैं खतरनाक बम्बें ते थेआरें गी नष्ट करने दी जिम्मेदारी अमरीका दी होग।

<><><><><><>

Sahitya-Academy

नामवर डोगरी लखारी सुर्गवासी चमन अरोड़ा होरें गी उंदी कताब “इक होर अश्वथामा” लेई 2024 बरे दा साहित्य अकादमी पुरस्कार दिता गेआ ऐ। संस्कृति मंत्रालय नै अपने इक बयान च आखेआ ऐ जे साहित्य अकादमी पुरस्कार लेई उंदी इस कताब दी ताल त्रै मिम्बरी कमेटी आसेआ आम सैहमति कन्नै कीती गेदी सफारश दे विनाह पर कीती गेई ऐ ते साहित्य अकादमी दे अध्यक्ष माधव कौशिक होरें एहदी मंजूरी देई दिती ऐ।

<><><><><><>